

Derowegen / Meine Seele / soltu deine Tauffe dir eine stets-  
werende Vermahnung seyn lassen / vnter dem Blutfähnlein Christi  
deines Heylands / wider den leidigen Satan / vnd alle seine Werke /  
daffter zu kämpffen vnd zu streiten / vnd eines Gottseligen Wandels  
dich zu befeiffigen.

Bernhard. de  
dup. Baptif.  
colum. 375.  
Wenn du aber ja / leider / wider deinen Eid vnd Pflicht / so du  
in der heiligen Tauffe Gott dem H E R R N geleistet / gehandelt het-  
test: So thue ware Busse / seuffze / vnd sprich mit Bernharde: Ir-  
ritum fecimus foedus primum, tibi peccavimus Domine,  
Satanæ & operibus ejus obligantes denuo nosmetipsos,  
jugo iniquitatis colla ultronea submittentes, & subjicien-  
tes nos miseræ servituti. Veni, Domine Jesu, etiam nunc;  
Jesu bone, ejice iterum fortiter, quem nos insipienter ad-  
misi mus. Tunc enim verè liberi erimus etiam nunc, si nos  
liberaveris. Das ist: O H E R R Jesu / wir haben / leider / das erste  
Tauffgelübde gebrochen / vnd an dir / O H E R R N / gesündigt / in  
dem wir / leider / dem Satan / vnd seinen Wercken / vns wieder-  
umb ergeben / vnd vns der schweren Dienstbarkeit der Sünden  
vnterworffen haben. O komme auch nun / H E R R Jesu; O gütiger  
H E R R Jesu / treibe abermal allmechtiglich aus / den schädlichen  
Gast / den wir so vnvorsichtiglich eingelassen haben. Denn also  
werden wir noch recht frey seyn / wenn du vns frey machest / A-  
men.

4. Sol auch vnser Tauffe andergestalt vns zur Vermahnung  
dienen: Als nemlich / daß wir alles Creuz vnd Verfolgung / auch  
den bittern Todt / da wir denselben / vmb Christi willen / leiden solten /  
gerne vnd willig für lieb nehmen; vnd mit vnserm eigenen vergosse-  
nen Blut / vmb Christi willen / vns teuffen lassen. Wie denn Chri-  
stus selbs sein Leiden vnd Todt / eine Tauffe nennet / Matth. 20.  
Matth. 20.  
Luc. 12.  
Baptismus  
Sanguinis.  
Können ihr euch teuffen lassen / mit der Tauffe / da ich mit getaufft  
werde? Luc. 12. v. 50. Ich muß mich zuvor teuffen lassen / mit  
einer Tauffe / vnd wie ist mir so bange / biß sie vollendet werde?  
etc. Also nennen die heiligen Aleväter auch das Martyrium, das  
ist / der Bekenner Christi Leiden vnd Todt / Baptismum Sangu-  
nis: